

## Ukweli Utashinda

*Mimi sitasema nanyi maneno mengi tena, kwa maana yuaja mkuu wa ulimwengu huu, wala hana kitu kwangu—Yohana 14:30.*

**K**ama Mwokozi wa ulimwengu, Kristo alikabiliwa na uwezekano wa kushindwa. Yeye, mjumbe wa rehema kwa ulimwengu wetu Alionekana kuwa anatenda sehemu kidogo ya kazi Aliyotaka kukamilisha katika kuadilisha na kuokoa. Mivuto ya Shetani ilikuwa daima ikitenda kazi kumzuia. Lakini hakukata tamaa. Kwa njia ya unabii wa Isaya amesema, “Nimejitaabisha bure, nimetumia nguvu zangu bure bila faida; lakini hakika hukumu yangu ina Bwana, na thawabu yangu ina Mungu wangu... na Israeli wakusanyike mbele yake tena; (maana mimi nimepata heshima mbele ya macho ya BWANA na Mungu wangu amekuwa nguvu zangu.” Ahadi hii ilitolewa kwa ajili ya Kristo, “BWANA Mkombozi wa Israeli, Mtakatifu wake, amwambia hivi yeye aliyedharauliwa na wanadamu; yeye anayechukiwa na taifa hili;... BWANA asema... nimekusaidia nami nitakuhifadhi, nitakutoa uwe agano la watu hawa, ili kuinua nchi hii na kuwarithisha urithi uliokuwa ukiwa; kuwaambia waliofungwa, haya tokeni; na hao walio katika giza, jionyesheni... Hawataona njaa, wala hawataona kiu; hari haitawapiga, wala jua; kwamaana yeye aliyewarhemu atawatangulia, naam, karibu na chemu hema za maji atawaongoza” (Isaya 49:4, 5, 7-10).

Yesu alisimama katika Neno hili na hakumpa Shetani nafasi. Wakati hatua za mwisho za mateso ya Kristo zinakaribia kuchukuliwa, wakati huzuni kuu ilipoikabili nafsi Yake aliwaambia wanafunzi Wake; “Kwa maana yuaja mkuu wa ulimwengu huu wala hana kitu kwangu.” “Yule mkuu wa ulimwengu huu amekwisha kuhukumiwa.” Sasa ... atatupwa nje. (Yohana 14:30; 16:11; 12:31.) kwa jicho la kinabii Kristo aliona tukio litakalotokea katika pambano lake la mwisho, alijua kuwa, atakaposema “Imekwisha,” mbingu yote itashangilia. Sikio lake lilisikia kwa mbali nyimbo na shangwe kuu za ushindi katika nyua za mbinguni. Alijua kuwa kengele ya mazishi ya ufalme wa Shetani itasikika na jina la Kristo litatangazwa katika sayari zote na kutukuzwa.

Kristo alifurahi kwamba angeweza kufanya zaidi kwa ajili ya wafuasi Wake kuliko vile ambavyo wangeomba au kufikiri. Alizungumza kwa uhakika akijua kuwa amri ya milele ilikwishatolewa kabla ulimwengu haujaumbwa. Alijua kuwa ukweli ulioimarishwa na uweza wa Roho Mtakatifu utashinda katika vita dhidi ya uovu, na kwamba bendera ile yenye madoa ya damu itapepea kwa ushindi juu ya wafuasi wake. Alijua kuwa maisha ya wanafunzi Wake waaminifu yatafanana na maisha Yake, mfulululizo wa ushindi ambao hautaonekana hivyo hapa, lakini utakaotambulika hivyo katika siku ile kuu.

(Tumaini la Vizazi Vyote, seh. 2, uk. 293, 294).